

Na osnovu člana 4.8. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02) i čl. 6. i 7. Pravilnika o tarifnom postupku ("Službeni glasnik BiH", broj 44/05), rješavajući po zahtjevu "Nezavisnog operatora sistema u Bosni i Hercegovini", broj: 50/09 od 30. oktobra 2009. godine, Državna regulatorna komisija za električnu energiju, na sjednici održanoj 27. aprila 2010. godine, donijela je

ODLUKU

1. "Nezavisnom operatoru sistema u Bosni i Hercegovini" određuje se potrebni godišnji prihod za 2010. godinu u iznosu od 6.182.071 KM i utvrđuje tarifa za rad u iznosu od 0,0435 feninga/kWh.
2. Tarifa iz tačke 1. ove odluke primjenjuje se za kupce u Bosni i Hercegovini koji preuzimaju električnu energiju sa mreže prijenosa, kao i za vlasnike licence za djelatnost međunarodne trgovine koji deklarišu izvoz električne energije.
3. Regulatorna tijela za električnu energiju u Federaciji Bosne i Hercegovine i Republici Srpskoj, te nadležno tijelo Brčko distrikta Bosne i Hercegovine, koriste tarifu određenu ovom odlukom prilikom određivanja tarifa za krajnje kupce, prema strukturi tarifnih elemenata u okviru pojedinih kategorija potrošnje.
4. Ova odluka stupa na snagu danom donošenja, primjenjuje se od 1. maja 2010. godine i bit će objavljena u "Službenom glasniku BiH" i službenim glasilima entiteta i Brčko distrikta Bosne i Hercegovine.

Odluka sa obrazloženjem dostavit će se podnosiocu zahtjeva i umješaćima u tarifnom postupku i objaviti na internet stranici DERK-a u roku od 30 dana od dana donošenja.

Obrazloženje

Uspostava "Nezavisnog operatora sistema u Bosni i Hercegovini" (u daljem tekstu: NOS BiH) omogućena je donošenjem *Zakona o prijenosu, regulatoru i operatoru sistema električne energije u Bosni i Hercegovini* ("Službeni glasnik BiH", broj 7/02) i *Zakona o osnivanju Nezavisnog operatora sistema za prijenosni sistem u Bosni i Hercegovini* ("Službeni glasnik BiH", broj 35/04).

NOS BiH je vlasnik licence za obavljanje djelatnosti nezavisnog operatora sistema, u skladu sa odlukom Državne regulatorne komisije za električnu energiju (u daljem tekstu: DERK), broj: 05-28-007-16/06 od 28. juna 2007. godine ("Službeni glasnik BiH", broj 54/07). Tarifa za rad NOS-a BiH je, prema članu 22. *Metodologije za izradu tarifa za usluge prijenosa električne energije, nezavisnog operatora sistema i pomoćne usluge* ("Službeni glasnik BiH", br. 46/05, 17/07 i 11/09 - u daljem tekstu: *Tarifna metodologija*), namijenjena za pokrivanje troškova rada NOS-a BiH koji nastaju obavljanjem djelatnosti propisanih čl. 2. i 7. Zakona o osnivanju Nezavisnog operatora sistema za prijenosni sistem u Bosni i Hercegovini ("Službeni glasnik BiH", broj 35/04).

Tarifa se, shodno članu 23. *Tarifne metodologije*, utvrđuje na osnovu troškova za obavljanje regulirane djelatnosti i fizičkog obima usluga u okviru regulirane djelatnosti. Troškovi za obavljanje regulirane djelatnosti i fizički obim usluga koji pruža regulirana kompanija utvrđuju se

na osnovu podataka sadržanih u zahtjevu za odobrenje tarife. Kod utvrđivanja tarifa DERK može koristiti i dodatne podatke za koje smatra da su potrebni.

U skladu sa članom 3. *Pravilnika o tarifnom postupku* ("Službeni glasnik BiH", broj 44/05), NOS BiH podnosi DERK-u zahtjev za odobrenje tarifa. NOS BiH podnio je zahtjev za odobravanje tarifa broj: 50/09 od 30. oktobra 2009. godine (zaprimljen 2. novembra 2009. godine pod brojem: 04-28-348/09). Zahtjev je podniet na obrascima propisanim *Odlukom o određivanju obrazaca za dostavljanje podataka u tarifnom postupku* ("Službeni glasnik BiH", broj 44/05) sa potrebnim priložima.

U skladu sa čl. 4. i 9. *Pravilnika o tarifnom postupku*, iskazani podaci moraju biti jasno izloženi, tako da omogućavaju njihovu potpunu identifikaciju i moraju pružiti dovoljno informacija da bi se mogla donijeti odluka.

Razmatranje zahtjeva za tarife kroz postupak odobravanja tarifa u najvećoj mogućoj mjeri mora ispoštovati osnovna načela koja propisuju da će tarife biti pravedne i razumne, ravnopravne, zasnovane na objektivnim kriterijima i opravdanim troškovima, te određene na transparentan način. Podnosilac zahtjeva za odobrenje tarife dužan je dokazati da predložena tarifa ispunjava zahtjeve iz zakona BiH i pravila i propisa DERK-a.

Zahtjev NOS-a BiH navodi slijedeće troškove i rashode za 2010. godinu: troškovi materijala u iznosu 86.000 KM, troškovi usluga 1.332.962 KM, troškovi radne snage 3.449.181 KM, amortizacija 1.395.378 KM, troškovi kamata 249.656 KM, ostali troškovi 165.300 KM, ostali rashodi 512.000 KM, tj. ukupno troškovi i rashodi 7.250.477 KM.

NOS BiH je dopisom broj: 09-130/10 od 18. januara 2010. godine zatražio dopunu svog osnovnog tarifnog zahtjeva s obzirom da mu u trenutku podnošenja istog nisu bile poznate stvarne veličine troškova godišnjeg održavanja PSS-a softvera i članarine ENTSO-E-a, naknadno kandidirajući za odobrenje po ovom osnovu i dodatnih 15.781 KM.

Sa ovom dopunom, ukupno potreban godišnji prihod po tarifnom zahtjevu iznosi 7.266.258 KM.

NOS BiH u zahtjevu navodi da je na bazi ocjene ostvarenja Finansijskog plana za 2009. godinu kao i njegovog ostvarenja za 9 mjeseci, sačinjen detaljan analitički plan troškova po modelu ISO planiranja, kao i ostale bilansne pozicije, uključujući plan investicijskih i kapitalnih ulaganja, te plan kredita za 2010. godinu.

Finansijsko poslovanje NOS-a BiH u 2010. godini opredjeljivat će slični uvjeti i pretpostavke koji su obilježili i poslovnu 2009. godinu. To se prvenstveno odnosi na već standardiziranu strukturu troškova, postojeće ljudske resurse, uz planirano zapošljavanje 3 nova izvršioca, te materijalni i već dostignuti tehnički ambijent u kome NOS BiH ostvaruje svoju djelatnost. Nastavit će se otplata domaćih i ino-kredita prema otplatnim planovima iz sredstava amortizacije, a ostatak će se uložiti u već započete projekte koji će se realizirati u prvoj polovini 2010. godine.

NOS BiH naglašava da je zbog dosljedne primjene pojedinih zakonskih propisa, prije svega, poreza po odbitku, te plaćanja članarina međunarodnim udruženjima kao i obračuna amortizacije primjenom MRS-a, došlo do prekoračenja pojedinih grupa troškova i pored činjenice da su svi drugi troškovi u okviru te grupe veoma restriktivno planirani i ostvareni.

Zahtjev sadrži i planirani fizički obim usluga na prijenosnoj mreži za 2010. godinu koji se naslanja na podatke iz Bilansa električne energije na mreži prijenosa za 2010. godinu. Isporuke sa prijenosne mreže iznose 11.667.179.935 kWh a zbir bilansnih viškova svih elektroenergetskih

subjekata u BiH, umanjen za isporuke domaćim elektroenergetskim subjektima, iznosi 2.529.270.065 kWh.

Zahtijevana tarifa je odnos potrebnog prihoda i energije koju preuzimaju domaći kupci uvećane za deklarirani izvoz i iznosi 0,0572 feninga/kWh, nakon što je uzeta u obzir dopuna tarifnog zahtjeva prema kojem je zahtijevana tarifa bila proračunata u iznosu od 0,0570 feninga/kWh.

Nakon pregleda obimne dokumentacije, potpunost zahtjeva NOS-a BiH je potvrđena aktom DERK-a broj: 04-28-348-1/08 od 23. novembra 2009. godine, o čemu je NOS BiH obaviješten dopisom broj: 04-28-348-2/08 od 1. decembra 2009. godine, pa se u nastavku tarifnog postupka moglo pristupiti ocjeni svih podnijetih dokaza uz pridržaj prava DERK-a da traži dodatne podatke i informacije kada to bude smatrao potrebnim.

Zahtjev NOS-a BiH je rješavan provođenjem postupka formalne rasprave, u svemu prema odredbama *Pravilnika o javnim raspravama* ("Službeni glasnik BiH", broj 38/055), prema čijoj je odredbi člana 45. DERK kratkom obavijesti u dnevnim novinama i na svojoj web stranici upoznao javnost sa sažetkom podnijetog zahtjeva i mogućnošću zainteresiranih članova javnosti da se neposredno upoznaju sa zahtjevom i upute pisane komentare u vezi sa predmetom tarifnog postupka.

Obavijest za javnost je pozvala i lica zainteresirana da u postupku formalne rasprave učestvuju kao umješači da pismeno dokažu svoj interes, te najavila održavanje formalne rasprave o zahtjevu.

Nakon dostavljanja zahtjeva za stjecanje statusa umješača, DERK je zaključkom broj: 04-28-348-12/09 od 12. januara 2010. godine dozvolio učešće u postupku u svojstvu umješača kako bi saslušao svjedočenja o pozicijama i interesima slijedećih subjekata: Aluminij d.d. Mostar, JP "Elektroprivreda Hrvatske zajednice Herceg Bosne" d.d. Mostar, Mješoviti holding "Elektroprivreda Republike Srpske", Matično preduzeće, a.d. Trebinje, JP "Elektroprivreda Bosne i Hercegovine" d.d. Sarajevo.

Umješači nisu koristili pravo da izvrše neposredan uvid u cjelokupnu dokumentaciju uz zahtjev za tarife.

Pripremna rasprava o podnijetom zahtjevu NOS-a BiH održana je 20. januara 2010. godine u Tuzli. Na pripremnoj raspravi utvrđena je lista pitanja koje je trebalo raspraviti i tok formalne rasprave. Na formalnoj raspravi održanoj 4. februara 2010. godine, strane u postupku su prezentirale svoje dokaze kako bi se utvrdile sve relevantne činjenice. Obradeno je svako od pitanja sa utvrđene liste i to sukcesivno odgovorom podnosioca zahtjeva i komentarima i podpitanjima umješača i voditelja postupka.

Konačan izvještaj voditelja postupka opisuje tok postupka, ponuđene dokaze i utvrđene činjenice, relevantne pravne odredbe i preporuku članovima Komisije (u daljem tekstu: Komisija) i dostavljen je stranki u postupku aktom DERK-a, broj: 04-28-5-348-59/09 od 18. marta 2010. godine, te trećim zainteresiranim licima koja su dokazala direktan interes da učestvuju u tarifnom postupku i kojima je takav status pravovaljano priznat od strane DERK-a. Analiza troškova i prihoda, izložena u konačnom izvještaju voditelja potvrđuje, odbija ili prilagođava pojedinačne stavke, veličine ili metode korištene za pripremu prijedloga tarife, u skladu sa diskrecijskim pravima DERK-a u tarifnom postupku.

Izvještaj je trebao da pruži razumnu osnovu Komisiji da na predočenim podacima, argumentima i pojašnjenjima, te komentarima NOS-a BiH (broj: 01-840/09 od 22. marta 2010. godine) i

zainteresiranih lica (Aluminij d.d. Mostar, komentari pod brojem: 2622/10 od 25. marta 2010. godine, MH "Elektroprivreda Republike Srpske", Matično preduzeće, a.d. Trebinje, komentari pod brojem: 1-1/03/2-203-21/10 od 23. marta 2010. godine, JP "Elektroprivreda Hrvatske zajednice Herceg Bosne" d.d. Mostar, komentari pod brojem: I-4809/10 od 25. marta 2010. godine, JP "Elektroprivreda Bosne i Hercegovine" d.d. Sarajevo, komentari pod brojem: 01-7527/10 od 25. marta 2010. godine), datim na prijedlog ovog izvještaja, nakon što ih pažljivo razmotri i procijeni, donese svoju konačnu odluku o podnijetom zahtjevu.

NOS BiH u svojim komentarima na konačan izvještaj voditelja u postupku određivanja tarifa za rad NOS-a BiH ističe: da sa predloženim iznosom troškova usluga nije moguće osigurati održavanje svih softvera te u skladu s tim predlaže da se za ovaj trošak odobri iznos od 1.190.257 KM, da je neophodno uvećati trošak radne snage za dodatnih 57.630 KM kako bi se dostigao nominalni prosjek ličnih primanja iz 2008. godine, te da u tarifu za 2010. godinu treba uključiti i trošak kamata u iznosu od 117.937 KM koji će nastati po osnovu potpuno izvjesnog povlačenja tranše EIB kredita u 2010. godini.

Aluminij d.d. Mostar, kao umješač u tarifnom postupku, usprotivio se bilo kakvom povećanju tarifa zbog globalne ekonomske krize i recesije, navodeći da je zbog istih razloga i sam smanjio obim proizvodnje za 25% i plaće zaposlenicima 10-15%.

U komentarima MH "Elektroprivreda Republike Srpske", Matično preduzeće, a.d. Trebinje, ističe da iznos troškova materijala, usluga i ostalih rashoda treba zadržati na nivou odobrenog za 2009. godinu a troškove radne snage umanjiti u odnosu na dostignute u 2009. godini kako bi se postiglo ujednačavanje plaća po kvalifikacijskoj strukturi u elektroenergetskom sektoru BiH. Nadalje, insistira na konkretnom rješavanju statusa 371.134,70 EUR koje je ovaj umješač platio po kreditu EBRD 891/SCADA/EMS predlažući izradu plana otplate duga po ovom osnovu u skladu sa odobrenim sredstvima od amortizacije po godinama ili da se navedeni iznos definira kao njegovo vlasničko učešće u NOS-u BiH.

JP "Elektroprivreda Hrvatske zajednice Herceg Bosne" d.d. Mostar, kao umješač, u svojim komentarima predlaže da se DERK odredi po pitanju cjelokupnog troška vezanog za SCADA/EMS i TK sistem.

JP "Elektroprivreda Bosne i Hercegovine" d.d. Sarajevo, u statusu umješača, svojim komentarima analitički obrađuje uticaj tarife za rad NOS-a BiH na cijenu električne energije za različite kategorije krajnjih kupaca, troškove i poslovanje JP Elektroprivrede BiH, kao i uticaj prijenosne mrežarine na tarife po kategorijama krajnjih kupaca, posebno kupaca priključenih na naponski nivo 110 kV.

Komisija, dakle, mora usmjeriti svoja razmatranja na sve elemente u troškovnoj strukturi koje je isticao podnosilac zahtjeva, analizu troškova i prihoda izloženu u konačnom izvještaju voditelja postupka kao i komentare podnosioca zahtjeva i umješača podnošenih u toku cijelog postupka, te cjelovitom opservacijom odlučiti o podnijetom zahtjevu. Slijedom takve obaveze, Komisija izlaže slijedeća svoja stanovišta:

Po osnovu *troškova materijala*, NOS BiH traži značajnije povećanje u odnosu na ostvareni trošak u 2009. godini na koje će u ovoj grupi troškova presudno uticati angažman dodatnih sredstava uslijed povlačenja rezervnih dijelova sa zalihe za održavanje SCADA/EMS.

Smatrajući da ovaj angažman neće biti potrebno realizirati, te uvažavajući ustaljenu vrijednost ove grupe troškova u posljednje dvije godine, Komisija prihvata primjerenim troškove materijala odobriti u visini od 66.000 KM.

Kod određivanja *troškova usluga*, Komisija uvažava činjenicu da je NOS BiH potpisao ugovore o održavanju SCADA sistema, ali ne prihvata konstataciju NOS-a BiH da bi odobrenje troškova usluga u visini koju prognozira voditelj postupka prouzročilo nemogućnost održavanja svih softvera koje NOS BiH koristi u radu.

Cijeneći dosadašnju dinamiku izrade studija vezanih za rad elektroenergetskog sistema, te sve argumente iznesene u zahtjevu i na raspravi, Komisija kao odobreni iznos priznaje iznos od 1.145.257 KM koji je u kontinuitetu sa dosadašnjim odobrenim i ostvarenim veličinama na ovoj poziciji i koji će, po mišljenju Komisije, realno pokriti sve troškove planirane od strane NOS-a BiH na ovoj poziciji.

Pri određivanju *troškova radne snage*, koji su prema zahtjevu za 17% veći u odnosu na odobrene za 2009. godinu, Komisija je, između ostalog, respektirala jedinstveno iskazan stav umješača u tarifnom postupku o opradanom zadržavanju nivoa prosječnih primanja zaposlenih u NOS-u BiH na nivou ostvarenih u 2009. godini.

NOS BiH je predstavio svoje razloge zašto bi iznos troškova radne snage u 2010. godini trebao biti veći od 3.034.435 KM, koje je procijenio voditelj postupka, uz nivo zaposlenosti od 56 zaposlena, osporavajući uporedivost primanja zaposlenih u NOS-u BiH s ostalim subjektima u elektroenergetskom sektoru. Ovom u prilog iznosi podatke o 90% zaposlenih sa VSS te o znatnom učešću (27%) zaposlenika s posebnim naknadama na plaću. Nadalje argumentira, da broj članova Uprave i rukovodnog kadra u ukupnom broju zaposlenih iznosi 16% i da treba osigurati i pune plaće za dosadašnja tri pripravnika dispečera. I sam svjestan ekonomske situacije, podnosilac zahtjeva iskazuje razumijevanje da izostane povećanje ličnih primanja u 2010. godini ali smatra da je iznio dovoljno uvjerljivih dokaza o potrebi da dostigne nivo primanja zaposlenih iz 2008. godine od kada su primanja zaposlenih smanjena zbog primjene novih propisa u oblasti plaća.

Cijeneći naprijed navedeno, te da će se broj zaposlenih u 2010. godini povećati za jednog dodatnog radnika, Komisija odobrava iznos na poziciji troškova radne snage od 3.020.000 KM.

NOS BiH je u tarifnom zahtjevu zatražio odobrenje *troška amortizacije* za 2010. godinu u iznosu od 1.395.378 KM kao rezultat obračuna amortizacije na sva sredstva koja koristi uključujući i dio koji se odnosi na SCADA sistem koje su tri elektroprivrede u BiH platile kroz EBRD kredit. Iznos amortizacije na taj dio SCADA sistema iznosi 269.875,83 KM.

Komisija se prilikom procjene, odlučila umanjiti kompletan predloženi trošak amortizacije za dio koje su tri elektroprivrede otplatile kroz EBRD kredit i odobriti iznos troška amortizacije za 2010. godinu u iznosu 1.125.502 KM.

U tarifnom zahtjevu NOS BiH je dostavio dvije varijante iznosa *finansijskog troška* koji obuhvata troškove kamata na kredite i bankarske troškove za obradu i odobrenje kreditnih zaduženja. U jednoj od njih predviđeno je povlačenje prve tranše EIB kredita (ulaganje u adaptaciju i opremanje poslovne zgrade) kao i sredstva za anuitet istog troška u iznosu od 117.937 KM.

S obzirom da ovaj kredit još nije operativan, Komisija se nije odlučila da prizna trošak po ovom kreditu unutar grupe finansijskih troškova. U slučaju da se ovaj kredit realizira u 2010. godini, Komisija zadržava pravo da naknadno odobri troškove po ovom kreditu. Uvažavajući iznesene

činjenice te okolnost da su ostali troškovi iz ove grupe od ranije priznati, Komisija odobrava finansijske troškove za 2010. godinu u iznosu od 131.719 KM.

Komisija u potpunosti podržava argumentaciju voditelja postupka prilikom obrade stavki planiranih troškova NOS-a BiH za porez po odbitku, režijske troškove, a koje spadaju u grupu *ostalih troškova* i odobrava predloženi iznos od 165.300 KM.

Kod određivanja *ostalih troškova*, Komisija prihvata stavove umješača o potrebi smanjenja troškova ili bar zaustavljanja porasta istih, pogotovo onih na koje regulirani subjekat sam može uticati. Uvažavajući porast članarine za ENTSO-E za 2010. godinu na koji NOS BiH ne može uticati, na poziciji *ostalih rashoda* Komisija odobrava sredstva za ovaj trošak u 2010. godini u iznosu od 473.293 KM.

U okviru tarifnog postupka NOS BiH je zatražio da se prilikom određivanja tarifa za rad nezavisnog operatora sistema u obzir uzmu i predstojeće finansijske obaveze u vezi osnivanja Ureda za koordinirane aukcije međudržavnih prijenosnih kapaciteta u jugoistočnoj Evropi (CAO SEE) u iznosu od 28.808 €

Uvažavajući podršku Ministarskog vijeća Energetske zajednice iz 2008. godine osnivanju Ureda u Crnoj Gori, podupirući i sama proces uspostave ovog Ureda, Komisija će biti spremna odobriti finansijsku participaciju NOS-a BiH učešćem u tom procesu, kada ona bude aktuelna.

Shodno članu 25. *Tarifne metodologije*, podnosiocu zahtjeva se kao opravdani trošak priznaje i iznos po osnovu obaveze plaćanja regulatorne naknade u visini od 60.000 KM propisanoj *Odlukom o utvrđivanju regulatorne naknade za 2010. godinu* ("Službeni glasnik BiH", broj 77/09).

Na osnovu izvedenih analiza zahtijevanih troškova i rashoda podnosioca zahtjeva, Državna regulatorna komisija za električnu energiju kao potrebni godišnji prihod "Nezavisnom operatoru sistema u Bosni i Hercegovini" u 2010. godini utvrđuje i odobrava ukupni iznos od 6.182.071 KM i tarifu za rad, na osnovu ovako odobrenog potrebnog prihoda, u iznosu od 0,0435 feniga/kWh.

Pojedinačne komponente potrebnog prihoda Kompanija je u obavezi finansirati u okvirima ovom odlukom odobrenih vrijednosti, kako slijedi:

| | <i>Traženo</i> | <i>Odobreno</i> | <i>Traženo</i> | <i>Odobreno</i> |
|--------------------------------|----------------|-----------------|----------------|-----------------|
| Troškovi i rashodi | 2009 | 2009 | 2010 | 2010 |
| Troškovi materijala | 253 200 | 63.500 | 86.000 | 66.000 |
| Troškovi usluga | 1 547 042 | 1.059.950 | 1.340.257 | 1.145.257 |
| Troškovi radne snage | 3 740 000 | 2.941.307 | 3.449.181 | 3.020.000 |
| Amortizacija | 1 515 035 | 1 245 159 | 1.395.378 | 1.125.502 |
| Troškovi kamata | 452 900 | 271.190 | 249.656 | 131.719 |
| Troškovi licence i regulatorne | 0 | 63.164 | 60.000 | 60.000 |
| Ostali rashodi UO, UCTE, | 739 100 | 447 500 | 520.485 | 473.293 |
| Ostali troškovi | 191 810 | 117 000 | 165.300 | 160.300 |
| Vanredni rashodi | | 0 | 0 | |

| | | | | |
|-------------------------------------|------------------|------------------|------------------|------------------|
| Višak prihoda | | 298.055 | | |
| Višak rashoda | | | | |
| A. Ukupno troškovi i rashodi | 8.439.087 | 6.208.770 | 7.266.257 | 6.182.071 |
| B. Potreban prihod | 8.439.087 | 5.910.715 | 7.266.257 | 6.182.071 |
| Energija (kWh) | | 14.795.509.268 | | 14.196.450.000 |
| Tarifa (feninga/kWh) | | 0,0399 | | 0,0435 |

Tarifa određena u naprijed navedenom iznosu, po uvjerenju Komisije osigurava potrebni prihod za efikasan, siguran i pouzdan rad NOS-a BiH, odnosno omogućava pokriće svih razumno nastalih troškova i rashoda u poslovanju.

U okvirima razumnog diskrecijskog prava Komisije da potvrdi reprezentativnost i opravdanost svih podnijetih podataka i tvrdnji, da procjeni stepen vjerovatnoće ostvarenja svih prognoziranih troškova i rashoda, i u okvirima ovlaštenja DERK-a da do objektivizacije uvjeta za preciznije određivanje tarifa iste odobrava i u skladu sa konkretnim okolnostima u periodu podnošenja zahtjeva za odobrenje tarifa (član 21. *Tarifne metodologije*), na osnovu sveobuhvatnog razmatranja svih dokaza istaknutih u zahtjevu, konačnom izvještaju voditelja postupka, komentarima podnosioca zahtjeva i zainteresiranih lica (umješača), Komisija donosi odluku kao u dispozitivu.

Shodno članu 14. *Pravilnika o tarifnom postupku*, podnosilac zahtjeva kao regulirani subjekat ima obavezu osigurati pristup javnosti zvanično odobrenoj tarifi tako da ovom odlukom odobrena tarifa bude na raspolaganju javnosti u njegovom glavnom uredu tokom radnih dana i objavljena na njegovoj web stranici.

U skladu sa članom 9.2 *Zakona o prijenosu, regulatoru i operatoru sistema električne energije u Bosni i Hercegovini*, protiv odluke o odobrenju tarifa može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objavljivanja odluke.

Broj: 04-28-5-348-78/09

27. aprila 2010. godine

Tuzla

Predsjedavajući Komisije

mr Vladimir Dokić